



以般若波羅蜜利益諸菩薩，令得增長。又攝取者，是般若波羅蜜中有十地。令菩薩從一地至一地，乃至第十地。行般若波羅蜜，於一切法無礙故，得捷疾辯。有人雖能捷取，鈍根故不能深入。以能深入故，是利辯。說諸法實相，無邊無盡故，名樂說無盡。般若中無戲論故，無能問難斷絕者，名不可斷辯。斷法愛故，隨衆生所應而爲說法，名隨應辯。說趣涅槃利益之事故，名義辯。說一切世間第一之事，所謂大乘，是名世間最上辯。

般若波羅蜜雖廣說三乘法，非有定相，皆以十八空和合故。說攝取菩薩、七種辯、亦如是，以空智慧故。皆不可得。

須菩提言：「色不生，若不生，是不名爲色；受、想、行、識、亦不生，若不生，是不名爲識。六入、六識、六觸，六觸因緣生諸受，亦如是。檀波羅蜜不生，若不生，是不名檀波羅蜜；乃至般若波羅蜜不生，若不生，是不名般若波羅蜜。……乃至一切種智不生，若不生，是不名一切種智。」

是般若波羅蜜，諸法無生空寂故，不生法中無所分別。色不生，何以故？若一法空，則一切法皆空；若行者於一法中了了決定知空，則一切法中皆亦明了。若五衆不生，則非五衆相，乃至一切種智亦如是。

佛告釋提桓因：「色但有假名，須菩提不壞假名而說諸法實相。受、想、行、識但假名，須菩提亦不壞假名而說諸法實相。所以者何？是諸法實相，無壞不壞故，須菩提所說亦無壞不壞。眼乃至意觸因緣生諸受，亦如是……須陀洹乃至阿羅漢、辟支佛、佛。是但假名，須菩提不壞假名而說諸法實相。何以故？是諸法實相，無壞不壞故。須菩提所說亦無壞不壞。」

須菩提言：「如佛所說，諸法但假名，菩薩摩訶薩當作如是知，諸法但假名，應如是學般若波羅蜜。菩薩摩訶薩作如是學，爲不學色，不學受、想、行、識，何以故？不見色當可學者，不見受、想、行、識當可學者。菩薩摩訶薩如是學，爲不學檀波羅蜜，何以故？不見檀波羅蜜當可學者，乃至不學般若波羅蜜，何以故？不見般若波羅蜜當可學者。……乃至不見須陀洹果及一切種智當可學者。……色，色空，一切種智，一切種智空故。色空不學色空，乃至一切種智空不學一切種智空。若如是不學空，是名學空，以不二故，是菩薩學色空以不二故，乃至學一切種智空，以不二故。」

是菩薩能學無量無邊阿僧祇佛法，若能學無量無邊阿僧祇佛法，是菩薩不爲色增學，不爲色減學，乃至不爲一切種智增學，亦不爲一切種智減學。若不爲色增學、減學，乃至不爲一切種智增學、減學。是菩薩不爲色受學，不爲色滅學，亦不爲受、想、行、識受學，亦不爲滅學。乃至一切種智亦不爲受學，亦不爲滅學。……是色不可受，亦無受色者，乃至一切種智不可受，亦無受者。內外空故。菩薩摩訶薩一切法不受故，能到一切種智。

菩薩摩訶薩行般若波羅蜜，不見色生，不見色滅，不見色受，不見色不受。不見色垢，不見色淨，不見色增，不見色減。何以故？色、色性空故。受、想、行、識亦不見生，亦不見滅，亦不見受，亦不見不受，亦不見垢，亦不見淨，亦不見增，亦不見減。何以故？識、識性空故。……乃至一切種智性空。菩薩摩訶薩爲一切法不生不滅，不受，不捨，不垢不淨，不合不散，不增不減故，學般若波羅蜜，能到一切種智，無所學，無所到故。」

佛以大悲心，欲令衆生信受須菩提所說故，讚言：其智甚深。五衆從因緣和合生，無有定性，但有假名，假名實相者，所謂五衆如、法性、實際。須菩提所說，不違此理，何以故？聖人知名字是俗諦，實相是第一義諦，有所說者隨凡夫人，第一義諦中無彼此，亦無諍。乃至一切種智亦如是。衆生空，乃至知者、見者空故。須陀洹但有假名，乃至佛亦如是。菩薩知一切法假名，則應般若波羅蜜學，所以者何？一切法但有假名，皆隨順般若波羅蜜畢竟空相故。空故如幻、如夢。